

# GUVERNMAN LEPEP, FAS-A SOMAZ

Pandan dernye kanpayn elektoral, tu dimunn finn tann lalist promes ki Lalyans Lepep ti fer. Lerla kan finn ena *Diskur Program* ki Prezidan Repiblik ti lir, plizyer sa bann promes elektoral finn konfirme, e kan pu ena *Diskur Bidze* le 23 Mars, nu pu konpran ki mezir konkre guvernman -pe propoze pu realiz so Program politik, ekonomik e sosyal.

## Sertin mezir deza aplike

Li vre ki Guvernman MSM-PMSD-ML finn deza aplik serten mezir kuma ogmantasyon pansyon vyeyes e lezot alokasyon sosyal, kuma zel permi-a-pwin, uver lanket lor iregularite ki ti arive su rezim Ramgoolam, me ena osi serten lezot size lor lekel zot paret pe met aryer ubyen buz fix.

## Kart Idantite?

Lor kestyon Kart Idantite biometrik, apre ki Lalyans Lepep ti anonse ki pu detrir Baz Santral kot stok tu linformasyon kuma lanprint dimunn, aster zot paret pe atann zizman lakur avan azir: deza zizman dan sa 2 ka kont kart biometrik finn retarde buku. Anatandan dimunn ki pe tir kart pe oblize donn lanprint, e seki pe proteste kont donn lanprint pa kone ki pu arive apre le 31 Mars.

## Best Loser ?

Pandan kanpayn elektoral, Lalyans Lepep ti deza anonse ki zot anfaver mintenir sistem Best Loser kominal: enn sistem ki reprezant enn veritab perversyon nu sistem demokratik. Ziska ler li pa kler ki zot pu fer pu konturn sa problem ki Komite Drwa Imin Nasyon Zini finn sulve: pa kapav obliz kandida dan enn eleksyon zeneral deklar kominote si kalkil pu nom Best Loser baze lor sif resansiman 1972. Travayis ek MMM, avan eleksyon, ti vot enn mini-amandman tanporer pu permet fer eleksyon mem si ena kandida pa deklar komi-

depite Danielle Selvon paret pe propoze se pu re-aktualiz klasifikasyon kominal dan resansiman, e lerla kapav gard Best Loser kuma li ete. Sa li pu reprezant enn rekil istorik pu demokrasi, e an memtan, li pe expoz sa stratezi legalist e bankal ki Rezistans ek Alternativ finn swiv pandan preske 10 an lor sa size la.

## Prodiksyon

Me, se sirtu lor politik ekonomik ki program Lalyans Lepep paret ena plis febles: dan *Diskur Program* pena okenn mansyon kriz grav ki Lindistri Sikriyer pe traverse: pri disik finn telman degradingole ki Guvernman pe oblize sibvansyon plant-er pu zot kontinye plant kann: sa sibvansyon la pu plis ki Rs 200 milyon par an. Kuma nu dan LALIT pe dir depi plizyer lane: disik ek kann pena enn lavenir alonterm, se pu sa rezon la ki nu pe propoz diversifikasyon agrikol ek prodiksyon manze. Guvernman pa paret konsyan sa problem la ditu, ek Minis Agro-Indistri finn mem dir ki disik ek kann pu rantab dan lavenir!

## Somaz

Pu kreasyon lanplwa, Guvernman paret pe depann buku lor sekter PME: me nu tu kone ki lanplwa dan ti e mwayin lantrepriz, li byen instab, mal peye, e preker. Apre 4 an, 80% ti e mwayin lantrepriz fer fayit: alor pa zis sa sekter la reprezant enn gran gaspiyaz resurs, me li pa kree lanplwa stab.

Kriz ekonomik dan Lerop pe kontinye: lindistri turist pu kontinye geyn problem, lindistri textil parey. Ek depresyasyon Euro, mem sekter informatik pe kumans ralanti.

## Enn nuvo politik ekonomik

Si sa nuvo Guvernman pa pran konsyans gravite sityasyon ekonomik, si zot pa pare pu reflesi lor nesessite enn politik ekonomik Alternativ, alor

mante, lanplwa pu vinn de plizanpli preker e sezonye, lekar ant ris ek pov pu kontinye agrandi.

LALIT pu kontinye amenn kanpayn pu enn sistem prodiksyon ki garanti lanplwa stab, asir sekirite alimanter. Nu pu kontinye lite pu sa sistem sosyalist ki kapav garanti enn meyer lavenir pu lamas dimunn.

*Alain Ah-Vee  
pu LALIT  
Main Road,  
GRNW  
25 Fevriye 2015*

## Diego

Avan eleksyon Lalyans Lepep ti propoz amenn Britanik divan Lakur ICJ, Lakur Nasyon Zini dan La Hay. Lerla, dan Diskur Prezidan, pa mansyon sa. Okontrer, Guvernman vinn propoz "koz-koze" ar Britanik ek Amerikin. Sa pu reprezant enn volt-fas.

## Dan kad Fet Lindepandans Komisyon Sindikal LALIT

invit sinpatizan ek aktivist sindika alabaz pu enn seyans fim lor  
**lalit travayer minn sarbonnter**  
ki finn gayn buku pri internasyonal

## Harlan County, Kentucky

*par Barbara Kepple*

apre ki nu finn get fim la,  
nu pu ena enn deba.  
Nu pu sirtu diskit manyer fim la  
get lalit travayer,  
lyin ar sindika,  
rol dirizian sindika,  
rol fam dan sa lalit la, e  
manyer ki lexpertyans lalit avan  
finn kontribiye.

**Kontakte militan LALIT pu invitasyon,**  
ubyin sonn 208 5551,  
208 2132.

Sinpatizan LALIT invite dan enn  
**Reynion Fam**  
Muvman Liberasyon Fam,  
le **Dimans 8 Mars**, GRNW, 9:30am  
Pu invitasyon.

# MMM ek TRAVAYIS SORTI AFEBLI

Dan Lopoziyon, ena Travayis ek MMM, tulde afebli gravman.

## Parti Travayis

Parti Travayis an lanbo: Ramgoolam finn arete, large lor kosyon. Tu dimunn finn soke ar so kofor ek valiz ranpli ar biye Rs2,000, dolar, liv sterling ek Euro. Li finn *step down* kuma lider, telman sarz ki pe pez lor li, li grav. Travayis ena zis 4 depite. Tu so sef-defil finn gayn enn bate bef. Tu sa swiver ki ti pe flat Ramgoolam lor MBC inn al kave par la.

Depi 7 an, LALIT pe averti lor danze Ramgoolam so *inpinite*, danze so reyn deplizanpli monarsik. Zordi so bann abi expoze. Kan voler vizit so kanpman Ros Nwar, Ramgoolam, pu li kasyet so lavi prive ki li-mem li onte, li ris enn seri dimunn rant dan so senario. Kan lapolis al fer lafuy kot li River Walk, sann kut la, zot dekuver enn veritab kavern Ali-baba. Asterla, so anyin Guverner Labank, li osi, lor kosyon, so anyin Sef Servis Sekre, so anyin Sef VIPSU, zot tu lor kosyon. So fam inn sibir interogatwar 6 ertan. So metres inn sove, al Litali kot pena Trete Extradisyon ar Moris.

Parti Travayis pa finn disosye li ar Ramgoolam. Okontrer, zot pe tuzur donn li benefis didut. Arvin Boolell nuvo port parol sa Parti Travayis kompletman diskredite la.

## MMM

MMM, li osi, an debandad: Bérenger, antan ki lider, ti amenn MMM dan sa lalyans katastrof la. Si zame zot ti pu gayn eleksyon, se limem ki ti pu sarye responsabilite prolonz sa reyn innyob Ramgoolam. Bérenger ti pu a blame si Ramgoolam

ti gayn iminite kont purswit okriminel pandan 7 an. Ramgoolam ti pu kontiyn reyne ar inpinite parey kuma li finn fer deza plis ki 7-an.

Depi avan zot konklir zot Lalyans modi, LALIT ti amenn kanpayn lanwit-lizur kont e sa Lalyans e so 2yem Republik la.

Tu zot simagri lor “2 pli gran partit”, tu zot manigans pu partaz puwar dan kad zot 2yem Republik danzere, tu finn kraze kuma enn gran bokal vid ki elekter finn kudpye le 10 Desam.

Kawnting fini, Bérenger azir vit. Li kas lalyans, blam Ramgoolam.

Malgre zot 12 Depite, MMM byin afebli, e pe pli afebli. Ena pe menas demisyone, kuma Barbier. Klerman Steeve Obeegadoo ek Kavi Ramano inn byin ankoler, avek rezon. Ena posibilite ki MMM efrite plis.

## Guvernman

Lopoziyon feb, me Lalyans Lepep, ki finn eli, li pa enn veritab alternativ politik, nonpli. Li enn lalyans kolmate vit-vit pu desann *Lerwa Lion*. E, la, par exanp, ena Dayal, avek tu so lepase, pe rod monte. Ena PMSD ek MSM, ki pa tro diferan depi PT Ramgoolam, e dayer zot ti alye ar li ziska fek la. Zot pena enn program reyel pu sorti pei dan sa kriz sistem kapitalist finn kree. Zot ena zis enn-de “mezir”. Sertin zot mezir plito bon e zot dir zot “sosyalist inovativ”, me zot mezir napa konstitye sa kalite vizyon, sa kalite program an antye, ki sa lepok kriz dimande.

## Extra-Parlmanter

Buku nuvo parti ki ti gayn ponpaz lapres paret pe fonn, kuma pu Sheila

Bunwaree ek Roshni Muneeram. Parti Jack Bizlall ek Ashok Subron pe sibir konsekans lefet ki zot finn koltar sime pu Ramgoolam so Rolls Royce rule ver so 2yem Republik; setadir zot finn ale-mem avegleman avek zot politik pu enn *2yem Republik* ek pu reform elektoral kot *pa deklar kominote*, respektivman, san remarke ziska tro tar ki Ramgoolam ti pe servi zot. Antretan, Bizlall so EDP anonse ki li “pena program” ditu. Alor, li ni agos, ni adrwat. Kant-a Subron so Rezistans, li finn dir li pe mars dan mem sime ki Parti Travayis, e sa paret vre, kan get so program santrist. Li pa viz “sosyalism” ditu.

Alor, tusala pu dir ki LALIT ena pu kontiyn devlop sa Program ki pu anfet chalennj sistem kapitalist, kontiyn kree vizyon sifizaman pratik pu sorti dan sa kriz profon dan lekel sosyete Moris finn rantre, e konvink klas travayer, dabor, pu dibut pu sa program la.

## ID KARD: Ver Destriksyon Data-Base Santral?

Kan LALIT ti demar petisyon enn 20-enn lorganizayson kont Kart Idantite biometrik an 2013, nu ti krwar li enn batay vo lapenn amene kont sa “leta sirveyans” ki Ramgoolam ti pe instale, me nu pa ti krwar nu pu gayne. MSM ek MMM ti anfafer Kart la; tu dimunn ti paret kurbe divan Ramgoolam. Me, dusman-dusman, nu finn batir enn lafors imans kont kart, e asterla Guvernman Jugnauth inn angaz li pu detwir data-base santralize avek so lanprint ledwa ek foto biometrik ki stoke Ebenn. Amizir sa vinn enn viktwar, nu bizin gard presyon pu ki: lalwa amande pu ki li pa obligatwar ena enn Kart ID, ni li pa obligatwar prezant li a lapolis.

Pu rant an kontak avek LALIT, ubyin pu kareman ader ar LALIT, kapav e-mail nu lor lalitmail@intnet.mu, kapav sone lor 208 5551, 208 2132 (koz ar Alain), ubyin vizit nu GRNW, ubyin ranpli sa form la, poste li a Sekreter, LALIT, Main Rd, GRNW, Port Louis:

Mo nom .....